

Յուշադրի պատճենները ուղարկեցին և անդլիական ներկայացուցիչ Օ. Ուօրդրոպին և Ադրբեջանի կառավարութեան: Ներկայացուցիչները տեսակցութիւն ունեցան և Ադրբեջանի վարչապետի և Ղարաբաղի ընդհանուր-նահանգապետ Սուլթանովի հետ, որոնք այդ միջոցին Թիֆլիսում էին:

Մի քանի օր յետոյ գնդ. Հասկելին յուշադիր ներկայացրին և «Երևանի նահանգի վաղեմի բնակիչ թուրքերը», որոնք գանգատուում էին հայերի դէմ և խնդրում ամերիկացիների միջամտութիւնը: Յուշադրին կցւած էր մի ցուցակ, որի համաձայն հայերը Երևանի նահանգում աւերել էին 88 մահմե-տական գիւղեր, այրել 1920 տուն և սպանել 131,970 մարդ:

Ադրբեջանի կառավարութիւնը հաղորդում էր, որ «1918թ. յունւարից սկսած, նախ քան թիւրքերի Երևանի նահանգը գալը՝ հայերը քանդեցին աւելի քան 300 գիւղեր՝ կոտորելով այդ գիւղերի մահմետականներին մեծ մասը... Թիւրքերի Երևանի նահանգից հեռանալուց յետոյ, 1918թ. դեկ-տեմբերին Սասունի գոտեղը գինաթափեց Երևանի գաւառի Ղարախաչի և Վեդի-Չայի գիւղական համայնքների մահմետականներին և քանդեց Ղաղ-լու, Շահարլու, Ղարախաչ, Դահնաղ, Ղարաբէգլեար, Աղասի-Բէգլի և այլ գիւղերը՝ կոտորելով յիշեալ համայնքների բոլոր մահմետականներին: Նոյն ճակատագրին ենթարկեցին Միլլի Դարասի շրջանի մի շարք գիւղերի մահ-մետականները: Համարեա միաթամանակ, հայ զօրքերը շրջապատեցին Բասար-Գեշարի աւաններն ու կոտորեցին Կըզըլ-Վան, Սուրթան, Զազա-լու, Շահար և այլ գիւղերի մահմետականներին՝ բռնաբարելով կանանց և Շահար գիւղի բազմաթիւ երեխաներին այրեցին թոնիրներում: Բնաջնջեցին և էջմիածնի ու Սուրմալուի գաւառների մահմետականներին... Օգոստ. 17-ին հայկական վարչութիւնը հայկական միլիցիայի անմիջական մասնակ-ցութեամբ սկսեց բնաջնջել էջմիածնի, Սուրմալուի, Երևանի և Նոր-Բայա-զէտի գաւառների մահմետականներին... Հայկական վարչութիւնը օգոստ. 17—31-ի կարճատե միջոցում կարողացել է ջարդել ու կոտորել էջմիածնի, Սուրմալուի, Երևանի և Նոր-Բայազէտի գաւառների միջև 50 գիւղ մահմե-տականներին»:^{*)}

Հասկանալի է, որ նման դիմումներն ու փաստերը պիտի ազդէին ամերիկացի Հասկելի վրա, որը ո՛չ ծանօթ էր կովկասեան պայմաններին ու բարքերին, ո՛չ էլ գաղութներ կառավարելու վարժութիւնն ունեցող անգլիա-ցու խորագիտութեամբ էր օժտւած:

Հասկելի գրութիւնը քննեց Խորհրդարանում ու կառավարութեան մէջ և որոշեց Հասկելի մօտ ուղարկել մի յանձնախումբ՝ պարզելու համար գրութիւնը: Սեպտեմբերի կէսերին Թիֆլիս մեկնեցին Ա. Խատիսեանն ու Ռ. Տէր-Մինասեանը, որոնց բացատրութիւնները լսելուց յետոյ՝ Հասկելը չեղեալ համարեց Ուսուպրէզովի հետ կնքած պայմանագրի Ղարաբաղին ու Զանգեզուրին վերաբերող կէտերը: Բայց այս անգամ էլ Ադրբեջանը մերժեց ընդունել այդ համաձայնութիւնը:

Երկար բանակցութիւններից ու ձգձգումներից յետոյ, սակայն, Հաս-կելը պնդեց իր տեսակէտի վրա և Նախիջևանի ամերիկացի նահանգապետ նշանակելով՝ կարգադրեց մտցնել այնտեղ ամերիկեան իշխանութիւն:

*) «Ալխատաւոր», 27 սեպտ. 1919թ.